

FORMASAUN
ANIMADÓR
SIRA
ORATÓRIU
NIAN

HA'U FIAR AMAN
MAROMAK

Molok hahú ita-nia enkontru sira atu hakle'an ita-nia fiar ita bele koko atu hatán ba kuiz ida ne'ebé website Youcat (naran ne'ebé mai husi Katekizmu ne'ebé entrega ba foin-sa'e sira iha Loron mundíal Foin-sa'e sira nian iha Madrid) propoin ba foin-sa'e sira ne'ebé reflele kona-ba sira-nia fiar.

SAIDA MAK FIAR?

- ☐ Obedece hodi la haree
- ☐ Koñesimentu no konfiansa
- ☐ Tuir buat ruma ne'ebé ita la hatene
- ☐ Ha'u-nia primu nia naran

Ida-idak bele hatán ba kuiz simples ida ne'e, hafoin imi bele fahe imi-nia resposta sira no rona maluk sira nia ideia.

FOIN-SA'E RUMA NIA RESPOSTA

Fiar mak resposta ne'ebé mane ka feto ida hatán ba Maromak nia bolun. Fiar mak resposta ne'ebé ema hakarak fó ho liberdade (Yorman)

Fiar mak husik Maromak kaer ó-nia liman no halo ó hamriik.

Fiar mak konfiansa tomak ba Ida ne'ebé DOMIN Na'in. No sai boot loron-loron, hodi tuir sira ne'ebé halo ona dalan nia ezemplu (Victor Manuel)

Fiar katak ó moris tuir buat ruma ne'ebé ó la bele haree no la iha evidénsia, maibé ó iha konfiansa tomak no esperansa iha nia, no ó hatene katak buat ne'e iha duni, maski ó la haree (Bernice)

HA'U FIAR AMAN MAROMAK... NE'EBÉ HAKIAK EMA

Agora ne'ebé ita fahe ona ita-nia reflesaun kona-ba fiar ita bele koko atu komprende liafuan rua tan ne'ebé ita hetan iha “Simbolu fiar nian”: Aman Maromak no ema.

Iha nia livru kona-ba Jezús, Amo Papa hakerek: “Hodi hahú husi Maromak ita bele komprende ema no se ema moris iha relasaun ho Maromak, nia moris sei sai loos. Maibé Maromak la'ós “Deskoñesidu” ida, ne'ebé moris dook. Maromak hatudu nia Futar oin iha Jezús; iha Jezús nia hahalok no nia hakaran ita rekoñese Maromak rasik nia hanoin no ninia hakaran.” Loloos Jezús de'it mak apresenta didi'ak ba ema Maromak ne'ebé loos. Oras ne'e seita barak hakarak apresenta sira-nia lialoos kona-ba Maromak, maibé laiha ona revelasaun kona-ba Maromak: buat hotu ne'ebé ita presiza hatene kona-ba Nia, Jezús fó hatene ona.

Maromak rasik, atu bele hakbesik ema ne'ebé halai husi Nia ho Adão no Eva, hatudu nia An ba povu Israel hodi lori nia neineik ba lialoos.

Iha Testamentu Tuan, dala barak Maromak mosu ba ema hodi hatudu buat ruma kona-ba ninia An.

Bele fahe ba grupu, ka ema ida-idak koko lee pasajen ida husi sira ne'ebé tuir ne'e; hafoin evidénsia Maromak nia karakteristika ne'ebé hetan iha ninia pasajen

- * Jen 17,1-7
- * Ex 3,6-7
- * Ex 34,5-7

- * Is 43,1-3
- * Is 66,13

Iha asembleia ema ida-idak ka grupu ida-idak fahe buat ne'ebé nia deskobre kona-ba Maromak, no liuliu se, iha nia moris loron-loron nian, nia halo ona esperiénsia kona-ba karakteristika ida ne'e.

RESUMU

Iha Testamentu Tuan povu Israel fiar katak:

- ⇒ Maromak iha ba ema ida-idak, katak Nia hatene ema sira no hadomi ida-idak; tan ne'e ema bele fiar ba Nia
- ⇒ Maromak iha ba ha'u, katak Nia hatene no hadomi ha'u
- ⇒ Maski ema la haree Nia, Nia akompaña nafatin ema ida-idak nia moris no esperiénsia

ISTÓRIA IDA

Ema Arabia ida akompaña fransés ida iha rai-fuik maran. Dader-dader nia tuku tuur ba rai atu adora no harohan ba Maromak. Loron ida ema fransés ne'e dehan ba nia: "Ó mak beikten ida: Maromak la iha, ó seidauk haree Nia no nunka book Nia."



Ema Arabia la hatán.

Liu tiha oras ruma, ema fransés haree kuda kamelu nia ain fatin iha rai henek no hateten: "Haree to'ok, kuda kamelu ida liu husi iha ne'e!"

Maibé ema Arabia hatán: "Deskulpa señor, ita mak beikten, ita seidauk haree kuda kamelu no nunka book nia". "Ó mak beikten" – ema fransés hatán – "Ó la haree kuda kamelu nia ain fatin?"

Entaun, ema Arabia lolo liman no hatudu loro: "Ida ne'ebá mak Kriatór nia ain fatin: Maromak iha!"

Iha Timor mós bele akontese katak ema ruma dehan: "Ó mak beikten ida: Maromak la iha, ó seidauk haree Nia no nunka book Nia."

Ha'u bele hatán saida? Oinsá ha'u bele esplika ha'u-nia fiar ba Maromak?

Dala ruma ita sente Maromak dook husi ita. Ne'e parte mistériu Maromak nia domin nian: Nia mak boot no oin seluk liu, Nia mak Santu, kmanek liu...Ninia hanoin sira la hanesan ita-nian no nia dalan sira la hanesan ita-nia dalan sira (kf Is 55,8).

Dala ruma, bainhira kbiit buat aat nian, ita bele hanoin katak Maromak kbiit laek. Maibé, maski ita-nia kbiit atu lakon ona, Anjo nia liafuan ba Maria iha tempo Anunsiasaun nian "Ba Maromak buat ida la susar" mak loos nafatin. Bainhira ita serbisu tiha ona no kole, Maromak mai hasoru ita, bainhira ita senti mesak, nia buka ita no tur hamutuk ho ita.

Maromak nia domin hanesan liman ne'ebé ita bele kaer, hanesan naroman ne'ebé nabilan iha nakukun laran hodi hatudu dalan mai ita.

*Ha'u-nia
reflesaun*

Maromak hatene didi'ak ita tanba Nia halo ema tuir nia ilas, nu'udar buat moris ne'ebé bele komprende, senti ho liberdade, hadomi. Tan ita ema – mane no feto – hanesan Maromak rasik, nune'e ita bele hatene no hadomi Maromak rasik no mós ita-nia maluk feto no mane sira. Ema bele hatene buat barak, bele haree nia an nu'udar “na'i” rai nian, maibé nia “kmanek” ne'e la mai husi nia an rasik. Maromak halo ita, nia liman nia hahalok ikus nian, no Nia hein katak ita moris nu'udar ninia oan sira. Tanba Maromak halo ema nia fuan ba buat ne'ebé rohan laek, esperiénsia oinoin ne'ebé ita bele halo dala barak la fó ksolok loloos mai ita. S. Agostinho dehan: “Ita halo ami ba Ita, Na'i, no ami-nia fuan sei la hakmatek to'o nia horik iha Ita”.

Ema barak moris la hatene hetan Maromak nia prezensa, Jezús fó hanoin mai ita katak ita bele bolu Maromak “Abbà” (apa), maski ho respeitu ita bele halo relasaun ho Nia hanesan ita-nia aman ka inan, no ho Nia ita fiar katak buat hotu la bele halo lakon ninia domin.

Ho orasaun “Ami Aman” loron-loron ita hafoun ita-nia relasaun domin nian ho Maromak; dala barak ita reza lalais de'it tanba ita dekor ona, maibé loron hirak ne'e, ha'u sei koko atu reza neineik hodi hanoin ba buat ne'ebé ha'u-niaibun hateten no buat ne'ebé ha'u husu ba Na'i.



Iha pintura barak kona-ba Aman Maromak no kuaze hotu hatudu Maromak nu'udar katuas ida ho kbiit wa'in. Haree pintura iha sorin: Maromak kaer livru ida (Ninia Futar liafuan) no hateke ba kraik (ba mundu) hodi fó bensa.

Imi hanoin saida kona-ba buat ne'e? Bele hatán ba imi-nia esperiénsia bainbain nian kona-ba Maromak?